

obgeschr(iebenen) geldis vor idirmenlichen und an uffgeboth daran erholen.  
Actum sabbato post corporis Christi by dem burgermeister Wetterhan anno  
etc. XXXV<sup>to</sup>.

## 825.

1435 Juni 19

### *Vertrag über die Form der Rückzahlung einer Schuld.*

*fol. 149r* Peter Hutes vor konigen keyn Keppfin. Wir rathmanne bekennen und thun chunt mit deszim offin briffe, daz sich Peter Hut, unser mitburger, vor uns keyn Oswalt Keppfin dynir, der swager von Nuremberg, czu Keppfin hant und synir erbin, das er on an irer schult 14 tage noch sente Peters tag schirst komen zu Nureberg bezalen wolle 25 ryn(ische) guldin, darnoch obir eyn jar uf dy selbige tageczit abir 25 ryn(ische) gulden und vordir hen alle jar iczlichs besondern 20 gulden so lange das er Keppfin und syne erbin ire schult gancz uzgericht und bezalt hat, nemplichen dy do anlangit 100 und 53 ryn(ischen) gulden. Dy schult herkumt von eyne briffe, der in sich heldet 100 und 90 gulden 17 schillinge 10 heller, die Keppfin noch synir meynunge unvorgeldin noch uzsin stehen und Hut hat gekort, uf welche tageczit er om adir synen erben nicht bezalunge tette mit barem gelde adir mit guter ware, do er adir syne erbin so vil geld an bekommen mochte adir wen sy das entpfelen und darzu mechtigin worden uf iczliche tageczit besondern. So hat er gekort, daz man Keppfin, synen erben adir dynern umbe daz vortagitte gelt zu synen gutern, dy er denn hat, unvorclait helffin sal, daz er sich ane widerrede und an uffgeboth syns vortagitten geldes daran mag irholen. Wer abir, daz sich Kepffe mit saffran farbe wolle laszin bezalen und 1 czentner umbe dry nemen zu Nurenberg gewert kaufmans in der wage, so hat Hut gekort, daz er om adir synen erben uf Margarethen schirst komen schigken wolle 10 czentner farbe, uf Michaelis 10 czentner, uf wynachten 10, uf unsern jarmarg 10 czentner und uf Michaelis die leczten eilf zentner. Dy tageczit noch eyn ander folgende und uf welche der tagezit eyne Hut nicht enhild, alz geschr(ieben) stehit, so sal man zu om helffen, alz vorberurt ist, ane widirrede und welcher der czweyer teidinge und kor Keppfe und syne erbin folgin wollen und uns daz schr(eiben) zwischzin hir und Petris adir in acht tagin darnoch unferlichen. Dem hat Hut globet so nach zu komen. Auch ist beteidigit, daz Hut und syne habe uf eyn sulchz von Keppfin und synen erben sullen ungehindirt syn, mochte ouch Hut Keppfen berethen, daz der schult mynnir wer, denn oben geschr(ieben) stehit, daz solde Hut an der geschr(iebenen) schult an der leczten tagezit abegehen. Geschen des sontages noch unsers Herren lichnamps tage anno etc. XXXV<sup>to</sup> etc.

Item Keppfe wil daz kuppfer haben.